

Headlines

1. उपराष्ट्रपति जगदीप धनखड़ होरें श्री माता वैष्णो देवी यूनिवर्सिटी दे दीक्षांत समारोह च हिस्सा लैता ते आखेआ जे राष्ट्र दा हित सब्बनें शा उप्पर ऐ ते दफा-370 गी हटाया जाना ऐतिहासिक ऐ।
2. लेफ्टिनेंट गवर्नर मनोज सिन्हा होरें नौजवानें दा आह्वान कीता ऐ जे ओह देसै दे विकास गी अग्रे बधान ते भारत गी दुनिया दी सब्बनें शा बड्डी अर्थबवस्था बनाने च जोगदान देन।
3. केन्द्री मंत्री किरें रिजिजू होरें श्रीनगर च 'बजट पे चर्चा' कार्यक्रम च हिस्सा लैता ते जम्मू-कश्मीर दे बजट बारै चर्चा करने दे कन्नो-कन्नी वक्फ बिल दी वकालत कीती।
4. स्पीकर अब्दुल रहीम राथर होरें मुख्यमंत्री ओमर अब्दुल्ला हुंदे'नै मिलियै असैम्बली दे औंदे बजट इजलास ते कम्मकाज मतल्लक चर्चा कीती।
5. जम्मू-कश्मीर सरकारै पंचैतें ते शैहरी मुकामी निकायें च ओबीसी आरक्षण लेई पैनल दी अवधि गी 28 फरवरी तगर बधाई दित्ता ऐ।

<><><><><><>

VP Convocation

उपराष्ट्रपति जगदीप धनखड़ होरें अज्ज कटड़ा च श्री माता वैष्णो देवी यूनिवर्सिटी दे 10में दीक्षांत समारोह च हिस्सा लैता ते संसीन दे मेधावी विद्यार्थिएं गी सम्मानत कीता। इस मौके पर बोलदे होई उपराष्ट्रपति होरें जोर देइयै आखेआ जे राष्ट्री हित सियासी जां निजी हितें शा बद्ध बद्ध होंदे न। उनें राष्ट्रवाद गी भारत दा धर्म आखेआ ते इसगी सब्बने शा उप्पर रखने दा बाह्वान कीता। उपराष्ट्रपति होरें प्रधानमंत्री नरेन्द्र मोदी हुंदी अगुवाई च भारत दी तरक्की पर बी लोह पाई ते जम्मू कश्मीर गी विशेष दर्जा देने आली धारा 370 गी हटाए जाने गी इक एतिहासक गैह करार दित्ता ते इस प्रावधान गी आरजी दस्सेआ। उपराज्यपाल मनोज सिन्हा, मुख्यमंत्री उमर अब्दुल्ला ते शिक्षा मंत्री सकीना इत्तू होर बी कार्यक्रम च मजूद हे। कार्यक्रम दे मगरा उपराष्ट्रपति होरें अपनी घरै आली सने श्री माता वैष्णो देवी जी दी पवित्र गुफा च मत्था टेकेआ।

<><><><><><>

LG Convocation

उपराज्यपाल मनोज सिन्हा होरें अज्ज श्री माता वैष्णो देवी यूनिवर्सिटी दे 10में दीक्षांत समारोह गी संबोधत करदे होई स्नातकें गी शुभकामना देने लेई उपराष्ट्रपति जगदीप धनखड़ हुंदा आभार जताया। इस मौके पर बोलदे होई उपराज्यपाल होरें नौजवानें गी भारत दे विकास च योगदान देने ते इसगी दुनिया च सब्बने शा बड्डी अर्थबवस्था बनाने च मदद करने दा आह्वान कीता। उनें राष्ट्र दे भविष्य गी आकार देने च मुल्ले, नवाचार ते ज्ञान दे महत्व पर जोर दित्ता। उनें शिक्षकें गी रचनात्मकता ते जीवन भर सिक्खने गी बढ़ावा देने आस्तै बी प्रोत्साहित कीता।

<><><><><><>

Rijju Budget Pe Charcha

केन्द्री मंत्री किरण रिजिजू होरें अज्ज श्रीनगर च “बजट पे चर्चा” कीती ते 2025–26 आली ब’रे आस्तै जम्मू कश्मीर दे बजटीय आवंटन पर चिंताएं गी दूर कीता। इक संवाददाता सम्मेलन गी संबोधत करदे होई उनें जोर देइयै आखेआ जे केन्द्र प्रायोजित योजनाएं आस्तै फंड बक्खरे न ते लोड़ पौने पर बाद्धू संसाधन प्रदान कीते जांगन। रिजिजू होरें एह बी दस्सेआ जे जम्मू ते कश्मीर च लौहके ते दरमयाने दर्जे दे उद्योगें गी बढ़ावा देने आस्तै बागवानी क्षेत्र ते दस्तकारी दे कारीगिरें आस्तै बजट च विशेष प्रावधान कीते गे न।

इस दरान केन्द्री मंत्री होरें वक्फ(संशोधन) विधेयक दा बी बचाह करदे होई आखेआ जे एहदा उद्देश्य मुसलमानें दे फायदे आस्तै संपत्तिएं दा पारदर्शी प्रबंधन करना ऐ। उनें भरोसा दोआया जे एह विधेयक वक्फ संपत्तिएं गी दुरपयोग शा बचांदा ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800–11–7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए. आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

Speaker CM Meet

जम्मू-कश्मीर विधानसभा दे स्पीकर अब्दुल रहीम राथर होरें मुख्यमंत्री ओमर अब्दुल्ला हुंदे नै मिलियै औंदे बजट इजलास सरबन्धी कार्यक्रम ते विधानसभा दे कम्मकाज बारै चर्चा कीती। उं’दी इस बैठक दरान, मुख करी ध्यान, बजट इजलास गी नजीताकुन बनाने ते जम्मू-कश्मीर दे विकास-बाददे उप्पर केन्द्रित कीता गेआ। गौरतलब ऐ जे मुख्यमंत्री ओमर अब्दुल्ला होर बजट शा पैहले विधायकें ते होरनें जन-प्रतिनिधिं कन्नै सलाह-सुत्तर आहली बैठकां बी करै करदे न। उं’नें आखेआ ऐ जे सलाह-सुत्तर आहली एह बैठकां बड़ी महत्वपूर्ण न कीजे इंदे राहें उं’नें गी लोकें दिए आसें-तांगें ते प्राथमिकताएं गी समझने च मदाद मिलै करदी ऐ। ध्यानजोग ऐ जे जम्मू-कश्मीर विधानसभा दा बजट इजलास औंदी 3 मार्च थमां शुरु होग।

<><><><><><>

OBC Panel

इक महत्वपूर्ण गैह पुट्टदे होई जम्मू कश्मीर सरकार नै स्थानीय निकायें गी समर्पित पिछले वर्ग आयोग दा कार्यकाल 28 फरवरी तगर बधाई दित्ता ऐ। पंचैतें ते शैहरी स्थानीय निकायें च होरने पिछड़े वर्गें आस्तै आरक्षण दी सिफारश करने लेई पिछले ब’रे गठित इस आयोग दा कार्यकाल 31 दिसम्बर 2024 गी समाप्त होआ हा। एह पैहली बारी ऐ जिसलै निर्वाचित सरकार नै रिटायर्ड जस्टिस जनक राज कोतवाल हुंदी अध्यक्षता आले इस आयोग दे कार्यकाल गी विस्तार दित्ता ऐ। आयोग च राज कुमार भगत होर ते डॉ. मोहिंदर सिंह बडवाल होर सदस्ये दे रूपे च शामिल न।

मेद कीती जा'रदी ऐ जे आयोग म्हीने दे खीर तगर अपनी रिपोर्ट सौंपी देग जेहदे कन्नै पंचैत ते स्थानीय निकायें दे चुनाएं दी लत्त पदरी होग।

<><><><><><>

Akashvani KVK

आकाशवाणी जम्मू आसेआ कृषि विज्ञान केन्द्र सांबा दे सैहयोग कन्नै केवीके सांबा च रेडियो किसान दिवस मनाया गेआ जेहदे च खरी मती गिनतरी च सांबा जिले दे दूर-दरेडे ग्राएं थमां आए दे करसानें पूरे जोश कन्नै हिस्सा लैता। इस कार्यक्रम दा मकसद राई-बाई दिएं अज्जै-कल्लै दिएं तकनीकें ते सरकार दिएं कल्याण योजनाएं बारै जानकारी सांझी करना हा। इस मौके उपपर केवीके सांबा दे प्रमुख वैज्ञानिक प्रोफेसर संजय खजूरिया ते मुख् बागवानी अधिकारी मुकेश शर्मा होरें अपने विचार सांझे कीते। आकाशवाणी जम्मू दे सहायक निदेशक बच्चन लाल होरें इस मौके उपपर करसानें गी माहिरें कन्नै जोड़ने ते जागरूक बनाने लेई आकाशवाणी दी भूमिका उपपर लोऽ पाई।

<><><><><><>

Doda-Watan Ko Jano

इक महत्वपूर्ण पैहल दे तैहत डोडा दे डिप्टी कमीशनर हरविंदर सिंह होरें डीसी दफ्तर थमां "वतन को जानो" अखिल भारतीय टूर आस्तै 14एं विद्यार्थिएं दे इक दल गी झंडी दस्सियै रवाना कीता। जिला समाज कल्याण मैह्कमे आस्सेआ आयोजित एह दौरा विद्यार्थिएं गी भारत दी सगोसार सांस्कृतिक विरासत ते विकास दी प्रगति दा पता लाने दा मौका प्रदान करोग। इनें विद्यार्थिएं राजघाट ते इंडिया गेट जनेही थाहरें पर जाने दा मौका थोने पर प्रशासन दा आभार प्रगट कीता। डीसी डोडा होरें दस्सेआ जे एह दौरा विद्यार्थिएं दा मनोबल बधाग ते राष्ट्र दी बन्न-सबन्नता ते उपलब्धिएं दे बारे च उंदी समझ गी डूंहगा करग।

<><><><><><>

Surya Ghar Poonch

पुंछ जिले च अज्ज पीएम सूर्य घर मुफ्त बिजली योजना बारै इक महत्वपूर्ण समीक्षा बैठक लाई गई। पुंछ दे डिप्टी कमिशनर विकास कुंडल हुंदी प्रधानता तैहत लोआई गेदी इस बैठका च इमारतें दिएं छत्तें उपपर सूरज दी तपश कन्नै चलने आहले सौर उर्जा पैनल लाने बारै गल्लबात कीती गई ते जिले च अगले म्हीने तगर ऐसे 500 पैनल स्थापित करने दा लक्ष्य मिथेआ गेआ। इस मौके उपपर डिप्टी कमिशनर होरें ऐकड़े सौर उर्जा पैनल लाने दे कम्मै च तेजी आहने दी जरूरत पर जोर पाया तांजे एहदे राहें लोकें गी मुफ्त जां सस्ती बिजली उपलब्ध करोआई जाई सकै। घरें दिएं छत्तें उपपर लाए जाने आहले इ'नें सौर उर्जा पैनलें गी अक्षय उर्जा कन्नै जुड़ने दी दिशा च इक महत्वपूर्ण गैह दे तौर पर दिक्खेआ जा'रदा ऐ।

<><><><><><>